

SEGUNDA CARTA DEL APOSTOL

SAN JUAN

WERAR TAKU, MUNAZIÑI KUZ

¹Wejrqui Juan cjititĉha. Icliz jiliritĉha wejrqui. Jaziqui tii cartal cjiyrĉcuĉha Yooz illzta cullacaquin tjappacha naaža maatinacĉquin. Wejrqui anĉhuc werara k'ayachuĉha. Nižaza tjapa Yooz taku criichinacaqui anĉhucĉ k'ayachiĉha.

²Uĉhum kuzquiziqui werar Yooz taku žejlĉha, nižaza wiñaya želaquiĉha.

³Nižaza zuma munaziñi kuzziz kaman, Yooz Ejpĉtan nižaza Jesucristo Yooz Majchtan uĉhum yanapĉha. Nižaza uĉhum okĉcu, llan kuzziz cjskatĉha.

⁴Yekjap am maatinaca cherchinĉha, Yooz takucama kamñi. Nužupan, mantichiĉha Yoozqui. Nuž kamñi cherĉcu, ancha chipchinĉha wejrqui.

⁵⁻⁶Cullacalla, anziqui am roct'uĉha, porapat zuma munaza. Nii mantitaqui anaĉha anztakaz. Tuquitanpacha uĉhumqui nuž mantitapanĉha. Jakziltat zuma munaziñi kuzzizlaja, jalla niiqui Yooz mantitanacacama kamĉha.

Tuquitanpacha Yooz mantita nonzinĉhucĉha, zuma munaziñi kuzziz cjee, jalla nii.

INCALLÑI ŽOÑINACA

⁷Tii muntuquiz muzpa žoñinacaqui ojklayĉha, žoñi incallcan. Ninacaqui anaž criiĉha, Jesucristuž žoñž

curpuchiz kamchiĉha tii muntuquiz, nii. Jalla ninacaĉha incallñinacaqui. Nižaza Cristuž quintranacaĉha. ⁸Anĉhucqui nonžna. Anĉhucqui Yooztajapaž langža. Nii langža cuitaquiĉha, ana pertiznajo, arajpachquin zumanaca tanzjapa.

⁹Jakziltat Jesucristuž tjaajinta yapzaja, jalla niiqui anaž Yooztan tsjii kuzziz kamĉha. Nižaza jakziltat Jesucristuž tjaajintacama ana kamĉhaja, jalla niiqui anazakazza Yooztan tsjii kuzzizqui. Pero jakziltat Jesucristuž tjaajintacama kamĉhaja, jalla niiĉha Yooz Ejpĉtan nižaza Yooz Majchtan tsjii kuzzizqui. ¹⁰Jakziltat anĉhucaquiz tjonžcu Cristuž tjaajinta ana niicama tjaajinĉhaj niiqui, anaž Yooztan tsjii kuzziz nii jilaqui. Anĉhucqui nii žoñi ana kjuyquiz kjawznaquiĉha. Anazaž tsaanaquiĉha. ¹¹Jakziltat nii anawal žoñžquiz tsaanaĉhaj niiqui, nii žoñž anawal langz yanaptažokaz cjiĉha.

ŽERZ TAKUNACA

¹²Zumsira wacchi takunaca wejttaja žejlĉha. Pero tjappachaqui anal cjiyrz pecuĉha. Anĉhucaquin tjonz pecuĉha, uĉhum pora parlizjapa, porapat cuntintu cjisjapa.

¹³Am cullaqui illizakazza Yoozqui. Naaža maatinacaqui saludos apayžquiĉha. Jalla nužukazza.